

禮
部
志
稿



欽定四庫全書

禮部志稿卷六十七

明 俞汝楫 編

聖學備考

聖覽

進覽大學衍義

弘治十五年工科給事中陶諧言經史繁多難於遍覽
惟宋儒真德秀大學衍義一書簡而明約而盡乃治道

之指南請以是書一置經筵以備進讀一置宮禁以備
退覽庶益弘盛德大業於無窮有旨令禮部看議以聞
禮部言行義一書已命儒臣於經筵進講今諧復以為
言誠以治天下之大本大端莫要於此伏乞聖明俯納
其言益勤聖學不獨外而經筵雖內而宮禁亦置一編
用備觀覽則聖德愈宏治道益隆矣納之

推行聖學

弘治十一年禮部覆奏部院大臣所言內一事曰推行

聖學者請因今日所講之書驗古人已行之事獨運於
心以謹用人之道上曰推行聖學朕自體行其餘俱從
所議

經筵儀

初定經筵儀

正統元年禮部尚書胡濙等進經筵儀注先是少傅兵
部尚書兼翰林大學士楊士竒少傅工部尚書兼謹身
殿大學士楊榮禮部尚書兼翰林院學士楊溥言伏惟

皇上肇登寶位上以繼承列聖下以統御萬邦其根本在致力於聖學自古聖賢之君未有不由講學而能致治者也書曰王人求多聞時惟建事學於古訓乃有獲又曰僕臣正厥后克正僕臣諛厥后自聖后德惟臣不德惟臣繇是言之凡經筵講讀之官左右侍從之人必皆選正人用之君德庶有成也於是上命太師英國公張輔等推舉講讀官以聞上賜勅諭以輔知經筵事士奇榮溥同知經筵事少詹事兼侍讀學士王直少詹事

兼侍講學士王英侍讀學士李時勉錢習禮侍講學士
陳循侍讀苗衷侍講高穀修撰馬愉曹鼎兼經筵官翰
林院春坊等衙門儒臣分直侍講又以太子太保成國
公朱勇少保兼工部尚書吳中吏部尚書郭璉禮部尚
書胡濙兵部尚書王驥刑部尚書魏源都察院右都御
史顧佐侍班至是禮部進儀注一每月初二十二二十
二會講每日止用講讀官四員學士輪流侍班不用侍
衛侍儀執事等官侍班講讀等官入見行叩頭禮東西

分立先讀書次讀經或讀史每伴讀十數遍後講官直說大義惟在明白易曉講讀後侍書官侍上習書畢各官叩頭退

經筵會講禮儀

嘉靖改元七月該本部題為經筵事欽奉勅諭禮部朕惟講學修德乃帝王首務茲欲於八月初二日御經筵爾禮部其具儀并合行事宜來聞故諭欽此欽遵會同華蓋殿大學士楊廷和議得筵官經筵會講禮儀開坐

上請節奉聖旨是欽此

初御經筵禮儀

先期講讀官撰四書經書講義各一篇務要明白簡當切於正道各豫置於所講書

會講禮儀

每月初二十二二十二會講先期司禮監官陳設御案如前至期候上御文華殿侍衛侍儀執事進講禮同但各官止行叩頭禮是日各官俱青素衣服供事

侍班官

內閣 六部 都通大 詹事府 翰林院 國子監

光祿寺 五府 錦衣衛 鴻臚寺 六科 舊例禮科轉行

各科 太常寺 遇講讀之初例該祭

講書官 兩班輪流

詹事 祭酒 學士 諭德 侍讀 編修

展書官 兩班輪流

翰林院 修撰 編檢等官八員

寫講章並起止官

兩班
輪流

中書等官八員

執事官

鴻臚寺堂上官一員 錦衣衛堂上官一員 侍儀御

史二員 給事官二員 鳴贊序班八員 侍衛將

軍二十員

嘉靖九年三月該兵部咨稱駙馬都尉鄔景和係是管領大漢將軍侍衛帶刀人員例該經筵侍班該本部覆

題奉聖旨是欽此

罷雜流官侍班

成化四年二月六科給事中十三道監察御史皆言掌太常寺禮部尚書李希安發身道士不宜令預經筵上曰經筵之設所以講明道學關係甚重故侍從皆用文學之臣希安既非儒流可罷侍班但令供禮官之職

經筵進講

洪武朝進講

高皇帝干戈未戢文德先陳軍旅之際延召名儒如戊戌之春即召儒士許元葉瓚王胡翰汪仲山李公常金信徐孳童冀吳履張啟敬孫履會食寧越行中書省日令二人進講經史敷陳王道即位之後大開講筵靡間寒暑時發宏議覃為訐謨有老師聞人所不能窺一班者如洪武三年二月御東閣翰林學士宋濂待制王禕等進講大學傳之有土有人章上曰人者國之本德者身之本人主有德則人歸之如就父母有土有財自然

之理德不足以懷衆雖有財何用哉

十六年六月御謹身殿東閣大學士吳沈等講周書國
則罔有立政用儉人上曰國家不可有小人有小入必
敗君子故唐虞任禹稷必去四凶魯用仲尼必去少正
卯不幸有小人如畜毒藥不急去之必為身患小人巧
於悅上忍於賊下人君若喜其順適任其所為而不問
以為怨將在彼譬如犬馬傷人人不怨畜犬馬者乎沈
曰小人中懷奸邪而其所言甚似忠信不可不察上曰

然小人善於逢迎彼知人君所樂不顧非義乃傳會曰
是可為知人主不樂為者不顧天下國家亦傳會曰是
不可為自古知人為難知言亦不易也

十八年五月御華蓋殿大學士朱善進讀心箴畢上曰
人心道心有倚伏之機蓋仁愛之心生則伎害之心息
正直之心存則邪詖之心消羞惡之心形則貪鄙之心
絕忠慤之心萌則巧偽之心伏故人常持此心不為情
欲所蔽則至公無私自無物我之累九月命大學士朱

善講周易至家人上曰齊家治國其理無二使家長幼
內外各盡其分事事循理則一家治矣達之一國天下
舉而措之朕觀其要祇在誠實而威嚴誠則篤親愛之
恩嚴則無閨門之失

二十年五月御華蓋殿侍臣進講因論人之善惡感召
不得其常上曰為惡或免禍然無可為之惡為善或未
蒙福然無不可為之善人惟修其在已禍福聽天彼不然
者時未至耳

二十六年秋七月選秀才張宗濬等俾隨詹事府左右春坊官分班入直文華殿侍講畢進說民間利害田里稼穡等事間陳古今孝弟忠信文學材藝諸故事日以為常二十八年十二月侍臣進講尚書無逸上曰國家以勤興以逸廢勤與逸理亂所繫成王時天下宴然周公作是書上自天命下至生民間里怨詛莫不具載朕每反覆詳味求古今之用心書於殿壁朝夕省閱以為鑒戒今日聞之愈益警惕

永樂朝進講

文皇表章經學時抒藻思永樂二年八月大學士解縉
等進大學正心章講義上覽之至再曰人心不可有所
好樂一有好樂泥而不返則慾必勝理若心能靜虛事
來則應事去如明鏡止水自然純是天理朕每朝退默
坐未嘗不思管束此心又思為人君者但於宮室車馬
服食玩好無所增加則天下自然無事

宣德後歷朝進講

列聖相承崇師重道宣皇寫竟簡編丕降著述細旃之
談流為琬琰宣德二年三月御文華殿儒臣講孟子上曰
伯夷太公皆歸文王武王伐紂太公佐之伯夷扣馬見何
不同太公心在當時伯夷心在萬世無非為天下計也

二年冬十月御文華殿儒臣進講易觀大象畢上曰古
者帝王巡狩禮後世何以不行亦世勢不同也舜時五
載一巡狩二月東嶽五月南嶽八月西嶽十一月北嶽
一年遍天下五年又去後世人君一出千乘萬騎百姓

供億不亦難乎成周十二年一巡已與虞時不同况後世乎予以為治貴實效誠如古帝王選任賢良撫養百姓崇德報功畢協至公不患制度不一民風不振若以後世侍衛之衆征求之廣欲行時巡之制難矣

二年十二月侍臣進講貞觀政要上曰唐太宗致治之美庶幾成康實本乎此予謂安天下必先正其身未有身正而影曲上理而下亂者治國如栽樹本不搖枝葉茂盛君道清靜則百姓安樂皆要語也

三年二月御文華殿儒臣講舜典畢上曰觀二典三謨則知萬世君臣為治之道不出乎此以閏月定四時天道以明奠高山大川分別九州任土作貢地道以成克明峻德協和萬邦人道以建九官十二牧後世建官不同不出乎此當時君臣都俞吁咈更相告戒用圖治功氣象藹然何後世之不及也十月儒臣進講春秋畢上曰聖人匡世之功憂世之心備見此書當時先王禮樂法度日廢亂臣賊子接迹而起有此書而後天下皆知

尊周又曰孔子以尊周為本孟子乃以王天下勸齊梁何也聖賢之心無非為天下計孟子時不有王者興何以解生民之塗炭遂賜講官坐命左右賜果茗

六年三月御便殿命翰林儒臣進講大學平天下章畢上曰治天下不可無財用如生之者衆四語不必征暴橫斂而國用有餘矣又曰秦誓曲盡君子小人情狀人君審此則好惡用舍當矣漢唐中葉小人倖位妨賢病國卒為厲階聖賢之言萬世龜鑑

九年十二月翰林侍臣講周書畢上因論周之王業及成
康治效曰當時皆以周之不造及成王定奄平淮東土始
寧繼得罪人又大雷電以風王迎周公歸遷殷頑民而
王室以安自是刑措四十餘年歷代八百則知始之震
撼正天以維持鞏固之也譬如人之身不幸有疾加意
調治所以培固元氣克臻壽考天之所定豈偶然哉
孝皇虛懷聽納天語叮嚀惟恐不盡弘治十七年九月召大
學士劉健等至煖閣諭曰昨令李榮諭日講官陳善閉邪

陳字當作敷陳又言他字未當不若啟沃之然不必深忌須
直言無諱道理皆書中本有非是自撰若不說盡終無進
益論思輔導皆所當言可諭講官不必顧忌昨似有顧忌
耳是日天顏甚悅恐因此有所觀望故特示詳悉如此

十八年三月張元禎上疏勸經筵講太極圖西銘性理
諸書上嘉納之索太極圖一觀曰天生此人以開朕也
世皇銳意典謨既以無逸名殿時灑宸章刊為註疏四
年十一月上謂無逸一篇聖祖御序洪範均治天下之

法因命輔臣撰序刊布已復再註尚書名曰三要

六年六月上諭內閣令翰林講官日輪一員將經書通鑑撮其有關君德政事與修省之道者直隸其義以贖所未曉庶心得其旨而理自通大學士楊一清等言自古經史大義盡具宋儒真德秀所撰大學衍義一書中請修先朝故事日令儒臣進講上曰大學衍義可令直解參以時事以開朕學若日逐進覽恐不得精宜五日一進不以寒暑廢庶得探索精研不徒勞精神虛延日月一清等復請於

經筵講官內與日講官各分為兩班每逢三八日以次輪
講臣等仍日輪一員侍班至於春秋月日和煦涼爽之時
經筵日講俱照舊規惟三八日專講大學衍義上日講學
為治之首君道當先朕虛懷以受卿等及講官盡心講說
開誠啟沃以資朕學卿一清等侍班賈詠等日輪一員如
有召論不在此例至於春秋之時不必於三八日可以該
朝兩宮之日既免日講只於午後進講衍義庶並行而無
廢乃命侍郎溫仁和桂萼張璠詹事董玘侍讀學士徐縉

祭酒嚴嵩庶子穆孔暉諭德顧鼎臣張璧許成名洗馬張
瀚贊善謝丕更直進講十月上以日講論語曾子有疾章
諭諸臣無忌還當補講又以講官董玘行立無讓之體令
輔臣諭之玘自是見上屏息上謂其知改令供職既侍讀
汪佃講洪範九疇不稱旨上親講解其義謂輔臣曰人君
盡倫理於上萬姓化於下倫序明而道大備福將自至以
佃講讀遲鈍令吏部改調外任因命內閣選擇翰林諸臣
稱職者留用不稱者量材除他官三月御經筵國子監祭

酒陸深奏講章為內閣所改上曰此故事也汝有所見當別疏具聞若任己意必有雜說以亂理學

十年四月上幸西苑御無逸殿命大學士李時翟鑾坐講時進講書無逸篇鑾進講詩豳風七月之章武定侯郭勛及九卿大臣皆侍講畢上御豳風亭賜輔臣并勛等及翰林儒臣宴亭下退而勛等奏謝上曰朕以無逸殿豳風亭雖觀耕之所亦勤學所寓昨舉落成之禮因命輔臣進講賜卿等宴卿等當協心匡輔以躋太和

十一年九月講官侍讀學士吳惠郭維藩進講既退上諭
輔臣李時等曰講官惠言省無益之費停得已之役維藩
言去操切更張之弊務淳厚博大之體者云何卿等以朕
意問之有可補救時宜者令條列以對於是惠疏言方今
民窮財盡而宮殿興作不已採木燒磚大為川廣蘇常之
患此宜停罷各省歲辦物料宜勅有司准以折色解京從
宜置辦毋使民困於徵解之苦此宜節省且謂自鹽法阻
壞糧草改折諸邊積貯空虚宜減價惠商疏通餘鹽其輸

邊糧草可仍復本色以為足國經久之計維藩疏言今者士風漸漓一切好更張以取聲譽以誇張為變通安靜為迂腐嚴急為才幹寬厚為無能好惡任情不以為恥如此則俗薄而政龐非細故也宜申飭臣工崇本實修職業乞於各衙門條陳之旨擇其籌慮深長事可經久者方賜施行毋徇操切之論求人過甚立法太嚴庶幾養成惇大之俗且請復庶吉士之選以育人才停選貢之例以疏壅滯疏上各報聞二臣頗有所指切上亦不罪也

十二年十月禮部尚書夏言以學士進講上製聞過篇
賜之講

日講儀

正統元年二月定日講儀上御文華殿內閣學士侍班
不用侍衛侍儀等官凡日講官或四或六開讀初吉服
五拜三稽首後常服止一拜三稽首先一日進講義其
日講讀官先入直房候駕出內官傳宣入文華殿閣臣
於屏左右講官於東西煖閣門南各東西立少選閣臣

進屏內講官進屏南仍東西立候上口宣先生來同承
旨入稽首東西立讀書者先至御前一揖向左盤旋二
步至案展書壓金尺或壓兩旁或直或豎執牙籤讀五
過掩書一揖退讀經者亦如之以次進講進退之節皆
如讀儀講畢壓金尺盤旋二步一揖退文華殿賜茶文
華門賜酒飯一拜三叩首酒飯後俟進字畢進講史書
如前儀講畢一拜三叩首一揖候上出案舉手北向一
揖時上日御文華殿誦書講學至午後還宮

弘治間孝宗皇帝每日講二次

弘治十八年十月武宗皇帝即位大學士劉健等言伏
覩先帝初年日講常至歲暮不輟臣等擬於十一月初二
日為始伏乞聖明遵照先朝事例每日御文華殿煖閣
令臣等兩次進講則聖學可成太平可致實宗社萬年無
疆之慶除經筵事宜俟明春別請今將日講儀注條上
一伏覩皇上在春宮講讀論語尚書各未終卷今合於
每日接續講讀先讀論語五遍次讀尚書五遍講官各

隨即講明講畢各官皆退

一講讀後皇上裁決政務有暇即看字體隨聖意寫字
一幅不拘多寡俟午講時臣等恭者進呈

一近午初時講大學衍義歷代通鑑纂要講畢各退

一每日各官講讀畢或聖心於書義有疑即問臣等再
用直解務求明白

上曰朕以哀疚故久輟講今聞卿等述先帝顧命知講
學誠不可緩其如期舉行正德元年九月司禮監傳示

欲免午講閣臣劉健等疏陳不可經書固聖賢大道通
鑑乃古人事跡請如舊每日進講二次上曰已知之
嘉靖六年每月之三日八日用日講官二人講大學衍
義閣臣一人侍賜茶酒飯如日講儀

隆慶六年每日早閣臣及講官講畢各退上進煖閣少
憩司禮監將章奏進覽閣臣等進西房候上諮問即名
至御前敷陳疏中事情已迺率領正字官恭侍上還宮
隆慶間每日視朝畢即御講筵萬曆後以三六九日視

朝不講餘日冬夏不輟萬曆九年閣臣請章奏重大事情先進後殿面陳及講祖宗訓錄出仍同講官進講史書

儲宮備考

儲教上

洪武元年正月以李善長為太子少師兼詹事馮勝兼少詹事楊憲傅瓛兼府丞徐達兼太子少傅常遇春兼太子少保鄧愈湯和兼諭德章溢兼贊善劉基兼率更令三月以劉基為御史中丞兼太子贊善十月以梁貞王儀為太

子賓客秦鏞盧德明張昌為太子諭德上曰朕命卿等輔
導太子必先養其德性使進於高明然後於帝王之道禮
樂之教及往古成敗民間稼穡朝夕論說日聞讜言使
無非僻之干積久以化他日為政自然合道卿等勉之
十一月命諸儒作鍾山龍蟠賦置酒驩甚御製時雪賦
東宮官各賜袍服

二年十一月建大本堂取古今圖書充其中延四方名
儒教太子諸王分番夜直選才俊之士充伴讀上時賜

宴賜詩商推古今評論文字無虛日

三年四月命博士孔克仁等授諸子經定東宮官屬之制
上召東宮官屬及王府官屬諭之曰輔導之臣猶法度之
器先正已而後正人蓋德義者正人之法度善惡者修身
之衡鑑汝觀之梓匠雖有材木必加繩削乃能成器太子諸
王必得賢輔開導贊助乃能成德古人已行之事可為鑒
戒者採摭編次朝夕觀覽以廣知識亦有助於輔導羣臣
頓首謝復顧謂劉基曰古賢聖之君不忘修省富貴易驕

必至於荒縱未有不覆基頰首曰陛下此言萬世之福也
五年十二月復以宋濂為太子贊善

六年七月以儒士桂彥良為太子正字

九月命諸司常事故皇太子重事乃奏聞上謂皇太子
曰人君統天下人情物理必先周知然後臨事不惑吾
自起田里至於今日凡治軍旅理民事無不盡心恒慮
故嘗深念古人為治必廣視聽凡言之善者即行之不
善者雖不行亦思繹至再果不可然後置之夫慮事貴

明處事貴斷庶幾不眩汝生長宮掖未涉世故若局於見聞則視聽不廣且目雖能視不踰於闔耳雖能聽不越於庭而欲天下之務一一當理難矣汝宜親賢樂善以廣聰明逆耳必求其善順言必審其非汝其敬之

七年正月上召太子宫臣諭之曰汝知重器乎對曰商彝周鼎上曰非也太子天下重器人有彝鼎尚知寶愛太子主器之重寶愛之者必擇端人為輔朝夕與俱使熟聞善言不迺設行以成其德若委之便嬖近習是委

重器於塗矣汝等日輔太子講論誦說必導之以正使其道明德立才器充廣庶幾他日克勝重任以副朕望九年正月太子諸王侍上曰汝等聞修德進賢之道乎太子對曰儒臣講說知其畧矣未領其要上曰藻率雜佩為身之容恭遜溫良為德之容見於外者可以知內古之君子趨蹌有節升降有數周旋跬步不違矩度者其德充也已德既修足以服人賢者彙進不肖者自去天下國家未有不治不知務此鮮不敗矣夫貨財聲色

戕德之斧斤讒佞諂諛杜賢之荆棘當拒之如虎狼避之如蛇虺溺於所好必為其所陷汝等慎之

十年十二月上諭李善長等曰人君聰明雖是天性然物理必察識而後知人情必諳練而後熟若臨事不熟驟然斷決恐未盡善既行之後覺其非而欲改之妨事已多前者令皇太子射奏朝臣啟事練習國政恐聽覽之際處置未當自今政事啟於東宮者卿等二三大臣更為參決可否十二年三月上御華蓋殿皇太子侍上曰比讀何書對

曰商周之書上曰讀書亦知古君道否君道以事天愛
民為重其本在敬身人君一言一行上通於天下繫於
民敬以將之而後無不善善天必鑒之不善天亦鑒之
一言善四海蒙福一行不謹四海罹殃可不敬乎

二十五年九月以馮勝傅友德李景隆藍玉詹徽茹瑄
任亨泰杜澤楚樟康鐸楊靖皆兼東宮師傅等官

二十六年正月上御文樓太子侍上問近講經史何事
對曰昨講漢書七國叛漢上曰孰曲孰直對曰曲在七

國上曰此講官一偏之說宜言景帝為太子時常投博局殺吳王世子以激其怒及為帝又聽鼂錯之說輕意黜削諸侯土地七國之變實由於此若為諸子講此則當言藩王必上尊天子下撫百姓無撓公法如此則為太子者知隆親親之恩為諸子者知盡君臣之義

嘉靖三十二年二月上諭大學士嚴嵩等曰二王講讀朕聞昨秋止將尚書過口二三豈成學業自書入經先讀大學熟記徹講續以中庸鄉導點字若何昔仰荷皇考恩教

子至慈之中朕不用力今日何事克善不令力學又誤
矣蒿等對曰皇上追念皇考訓思令二王殿下力學臣
等不勝欽仰先書入經乃聖賢教人次第臣等去秋所
進書程據舊儀以大學與尚書每日並讀並講當導諭
行

儲教下

請諭教太子

弘治十年禮科給事中葉紳等言古帝王之有天下未

嘗不以儲貳為重教諭為急故早建太子以繫天下之心預選宮僚以輔太子之德所以享國長安率由茲道陛下以社稷為重四海為心既早建太子以定大計矣今皇太子春秋漸盛新命加冠教諭之道不容或緩宜令諭德等官量授經書教以誦讀正字等官量書字帖教以倣習庶習與智長化與心成實社稷萬年無疆之休也章下禮部覆奏紳等所言教諭太子實朝廷重大本之事乞賜採納詔待明年春煖以聞

皇儲四事

弘治十六年吏科給事中吳舜上疏言輔養皇儲四事
一乞勅宮僚弗辭寒暑竭力供事而其所以為教必以
仁孝禮義為本一乞專設東宮師傅一二員求德望素
協如尚書吳寬侍郎謝鐸者令以舊官供事俟其功蹟
顯著然後加以師傅之銜至如詹事庶子下至校書正
字等官亦必求中正之士出自進士正途者用之一乞
勅皇太子延訪宮僚朝夕與處講求古之帝王言行以

為法戒仍以大小宮僚輪直進言務引當道一乞求正直素聞善於開導者三四人以充司直清紀司諫之職仍勅皇太子虛已受言以為他日納諫之地疏入上命禮部同吏部議處以聞尚書張昇等言舜以太子天下之本必賴師傅輔弼之官朝夕啟沃宜賜施行其欲擇師傅并選補司直清紀司諫等官則非臣等所敢擅議乞勅內閣大臣同各衙門堂上官議擬具奏上命姑已之

博選鴻儒充宮僚

嘉靖十五年監察御史余光言今者聖嗣誕生異日正位東宮統臨大寶宗廟社稷天地生靈所關非小而其本則在於蚤諭教而已祖宗設東宮官屬如詹事府左右春坊司經局等官皆為輔導而置請博選鴻儒充師保賓客之任以立教於豫禮部議覆皇儲為天下本當慎蒙養請以光言下吏部預訪人材俟冊立舉行報可

東宮出閣講學五事

嘉靖二十三年南京禮科給事中游震得奏請東宮出閣講學因條陳五事一大明集禮皇太子加元服參用周文王成王冠禮之年近則十二遠則十五若出閣講學則年八歲則猶未及元服也今東宮出閣未及冠期宜加便服以從安適俟年十二以上始行冠禮則講學不至過時一出閣講學之後宜習宮庭朝參之禮及臨見羣臣參決機務等事一皇太子始出就學禮文宜從簡便令講讀儒臣更番陪侍隨事納忠不必盡拘講筵

之禮庶可使之好學不倦一國初所定皇太子答拜禮
非人臣所敢當宜聘有德望大臣致仕年七十以上者
使為賓客不煩以職事優之拜禮乃為得宜一仁宗宣
宗在東宮皆監國視事故備諸官屬及憲宗睿宗皆八
九齡故司直以下皆不備官今皇太子猶冲年講讀之
外似不必備設宜漸簡正士儲之翰林察其德業修舉
者以次推補事下禮部部言請俟出閣之日備查累朝
舊典參酌諸事宜以聞上然之

集議儲養要務

隆慶四年南京禮科給事中張宗倫等以東宮出閣屆期上言五事一宗孝敬以事君父二敦齒讓以賓耆舊三謹服器以養儉德四勤接見以資輔導五慎選用以備官屬南京貴州道御史楊邦憲等亦請擇簡講讀儒臣務略去禮文令其以經史諸書及國朝訓典從容勸講凡坊間一切蕪雜之書悉屏去之內直之司必用老成質實者使隨事納規啓發尤易皇上尤當克謹身教

以敬天勤民敦仁尚儉之事親為解說訓飭之斯儲養元良之要務章下禮部知之

禮科給事中張國彥四川道監察御史李采菲南京禮科給事中張崇儉貴州道監察御史楊邦憲等以東宮出閣各疏陳輔導事宜章下禮部尚書潘晟等覆言諸臣獻議雖殊大意有十曰慎選宮僚曰久任輔導曰精擇近侍曰親近師友曰內崇孝敬曰外崇齒讓曰仁體天地曰儉法祖宗曰欽崇正訓曰躬垂聖教宮僚在閣臣吏部遴選得

人上請久任左右近習在司禮監審擇質疑問難親接儒臣一切孝敬仁儉有關儲教者在皇太子遵修古誼以光睿德至於燕閒之際質問所業時加訓迪則惟皇上加意議上報可禮部覆都給事中維遵等奏東宮輟講之日除宮中溫習外宜於朔望日令輔導講讀等官恭詣文華殿啟請半月內課程疑義庶養正之功緝熙無間上是之

皇太子出閣讀書

天順二年禮部請皇太子出閣讀書上命吏部禮部會

翰林院定擬講讀等官及講讀以聞禮部進皇太子出閣
講學儀注

一欽天監選擇四月初八日乙丑巳時吉

一是日早鴻臚寺報事官於文華後殿行四拜禮鴻臚寺
官請東宮陞文華殿執事官導引至殿陞座三師三少并
宮僚以次序立於丹陛上行四拜禮畢各官以次退出內
侍官導東宮至後殿陞座以書案進每日侍班侍講讀官
入分班東西立內侍展書侍讀講官以次進讀叩頭而退

每日讀講常儀

一每日早朝退後東宮出閣陞座內侍以書案進不用侍衛侍儀執事等官惟侍班侍讀講官入行叩頭禮畢分班東西向立內侍展書先讀四書則東班侍讀官向前伴讀數十遍退復原班次讀經書或史書則西班侍讀官向前伴讀亦然務要字音正當句讀分明讀畢叩頭而退

一每日巳時侍班侍讀講及侍書官俟東宮陞座畢入照東西向立侍班內侍展書先講早所讀四書則東班

侍講官向前進講一遍退復原班次講早所讀經史書則西班侍講官向前進講亦然務要直言解說明白易曉講畢內侍收書訖侍書官向前侍習寫字務要開說筆法點畫端楷寫畢各官叩頭而退

一午膳後從容遊息或習騎射

一每日晚讀本日所授書各十數遍至熟而止

一凡讀書三日後一溫須背誦成熟遇溫書之日免授

新書講官通講須曉大義

一凡寫字春夏秋月每日寫一百字冬月每日寫五十字
一凡遇朔望及大風雨雪隆寒盛暑暫停講讀寫字

一每日合用侍班官二員侍讀講官四員侍書官一員吏
部禮部會翰林院選擬皇太子出閣侍班講讀等官以聞
侍班官則吏部尚書兼學士李賢日侍不更太常寺少卿
兼學士彭時翰林院學士呂原每人更侍一日詹事府詹
事陳文少詹事劉鉉日侍不更翰林院學士林文李絡劉
定之侍讀學士錢溥每人更侍一日講讀官翰林院學士

倪謙尚寶司卿兼侍講黃練尚寶司司丞兼編修萬安
尚寶司司丞兼編修李泰左春坊左中允孫賢右春坊
右中允劉翊左春坊左贊善牛綸右春坊右贊善司馬
恂八人更番四人一日侍書官太常寺少卿黃采中書
舍人兼正字吳謙二人更侍一日上悉從之

東宮冠讀

嘉靖二十四年二月上諭禮部朕皇太子當冠并習講
讀一應合行禮儀查照祖宗時舊例一一舉行即各擬

至當不必續奏已復奉聖諭東宮冠讀禮朕復思二三子各當行此各節次祖宗舊典俱在卿嵩會讚璧窠承恩查擬一一舉行禮部尚書費窠等言東宮冠讀儀節繁多一時未易盡習攷之周制文王年十二而冠成王十五而冠大明集禮參用文成冠禮之年近則十二遠則十五則在今日東宮殿下加冠似為太早乞將冠禮暫勅停止先以童服出就講讀則事為有序而禮不難行又會勳輔大臣言皇太子既不便出閣乞命司禮監

慎選老成端厚知書內伴恭伴讀書習字兼演習禮儀
俟睿性漸開禮節日熟然後出閣講讀疏入上乃諭輔
臣嚴嵩等曰朕先與卿等計定東宮冠讀遵祖宗法制
舉行既而禮官引文成之年歲不同累朝之令典謂為
未可卿等從而同之今只令輔臣該部挨當行之年具
奏行禮嵩等因言皇太子數歲而冠原無定期不必盡
泥文成之年伏乞俯從原定吉期或移取通利之辰遵
奉舉行得旨覽奏足見敬畏朕知己嵩復言東宮殿下

時已十歲令冠讀之諭一下中外忻傳合無是日稍減繁儀止取成禮此外或可頻接外臣漸廣視聽如冠禮暫輟或以童服出就儒臣時習講讀久之則睿性益開而知所嚴重矣得旨冠乃成人之禮太子繼體承命之重必典禮具備方可行既而復諭嵩東宮冠讀已聞中外只可移取通利之辰不宜暫罷問冠禮內儀物有絲巾何為嵩言彼在束髮乃婚禮內物不用為當又問廟見童服當是何服色嵩言今日之見係在內殿家人禮

也比與宗廟大禮不同似應照常所用吉服行禮已奉諭東宮廟見等儀非一節即今將入夏令恐難勉行俟秋爽舉未遲

選宮僚

永樂二年夏四月命僧錄司左善世道行為太子少師復其姓姚賜名廣孝賜勅諭曰卿秉性篤實學行老成今建儲嗣簡求賢輔以卿舊人特授太子少師夫太子天下之本必賴啓迪匡正輔成德器尚勉盡厥職副朕

眷倚之重又命禮部尚書李至剛兼左春坊大學士陞翰林院侍讀學士解縉為本院學士兼右春坊大學士翰林院侍讀黃淮為左庶子胡廣右庶子胡儼左諭德皆仍兼侍讀翰林院侍講楊榮右諭德仍兼侍講以翰林院侍講楊士奇兼左春坊左中允改北京刑部主事尹昌隆為左中允陞翰林院修撰李實右春坊右中允仍兼修撰命吏部左侍郎許思溫兼左春坊贊善陞翰林院編修陳仲完左贊善仍兼編修檢討王汝玉為右

春坊右贊善仍兼檢討陞國子監博士徐善述監察御史王

子沂俱為左春坊左司直郎國子監助教晁鑄刑科給事

中王文貴俱為右春坊右司直郎刑部司務楊正為左春

坊清紀郎國子博士楊斌右春坊右清紀郎教授程僖教

諭黃貫俱左春坊司諫教諭張詳梁善俱右春坊司諫陞

翰林院編修楊溥中書舍人姚友直俱為司經局洗馬溥

仍兼編修戶科給事中吳牧兼司經局較書吏科給事中

梁質兼司經局正字陞教諭劉真為較書訓導王雅為正字

天順二年三月吏部禮部會翰林院選擬皇太子出閣
侍班講讀等官以聞侍班官則吏部尚書兼學士李賢
日侍不更太常寺少卿兼學士彭時翰林院學士呂原
更侍詹事府詹事陳文少詹事劉欽日侍不更翰林院
學士林文李紹劉定之侍讀學士錢溥更侍講讀官翰
林院學士倪謙尚寶司卿兼侍講黃諫尚寶司司丞兼
編修萬安尚寶司司丞兼編修李泰左春坊左中允孫
賢右春坊右中允劉翊左春坊左贊善牛綸右春坊右

贊善司馬恂八人更侍四人一日侍書官太常寺少卿黃采中書舍人兼正字吳謙二人更侍

成化十四年二月皇太子出閣講學命大學士萬安戶部尚書劉翊禮部尚書劉吉提調講讀翰林院學士王獻詹事府少詹事黎淳翰林院學士謝一夔右庶子汪諧洗馬鄭環羅璟更番侍班學士彭華侍讀學士江朝宗左庶子劉健左諭德程敏政侍讀周經修撰陸鉞張昇張頤更番講讀經改左中允昇改左贊善修撰傅瀚

兼較書太常寺少卿謝宇禮部員外郎凌暉兼正字通
事舍人選除二員翌日改鴻臚寺序班耿寧紀本為之
弘治十一年二月大學士徐溥等以皇太子將出閣講學請
以太常寺卿兼翰林院侍讀學士程敏政侍讀學士楊守
陟左春坊諭德李旻司經局洗馬梁儲充侍班官太常寺
少卿兼侍讀學士李傑太常寺少卿兼侍講學士焦芳侍
讀學士兼左諭德王鏊右諭德王華洗馬楊傑侍讀劉機
江瀾白鈇侍讀武衛左中允楊廷和右中允張天瑞左贊

善費寵充講讀官編修兼較書吳儼靳貴禮部員外郎兼
正字周文通大理寺右寺副兼正字劉榮俱更直供事又
請改敏政為詹事兼學士陞鏊為少詹事兼侍讀學士上
俱從之仍命溥及大學士劉健李東陽謝遷提調各官講讀
嘉靖三十一年八月命翰林院編修高拱檢討陳以勤
充裕王講讀官伴讀改國子監助教尹樂舜鄭守德俱
翰林院待詔侍書中書舍人吳昂吳應鳳

隆慶六年二月以東宮出閣講學命禮部尚書高儀吏

部侍郎張四維洗馬余有丁贊善陳棟充侍班官少詹
事馬自強陶大臨編修陳經邦何洛文檢討沈鯉張秩
充講讀官檢討沈淵許國充較書官制勅房辦事大理
寺左寺正馬繼文徐繼申充侍書官先是大學士高拱
等請選東宮輔導官僚會同吏部推舉上曰東宮官宜
加慎選不必備員於是拱等疏名以聞上從之仍諭拱
居正提調各官講讀

冊立議

隆慶冊立

隆慶二年正月禮部尚書高儀等復上疏請立東宮其略言自古明王圖治忠臣謀國莫不以建儲為重所以定國本安人心也恭惟皇上篤生元嗣已踰六齡主器得人臣民懽戴早建豫養宜在此時臣伏覩宣德弘治中皇子皆二齡而冊立成化中皇太子六齡而冊立具在國史今皇子雖在冲年而舊典可據且竒表秀發睿質異常必冊立之儀既行則教養之道可舉惟皇上早

從衆心擇日行禮實宗社萬世無疆之休疏入上乃許之曰卿等請建皇儲至於再三瀝誠彌切陳義甚正特允所請其擇日具儀以聞三月辛酉上御皇極殿傳制冊立皇子為皇太子命成國公朱希忠為正使持節大學士徐階為副使捧冊寶詣文華殿行禮故事冊立東宮次日百官上表稱賀即詣文華殿上箋賀皇太子典禮官陳設太子座於殿中自嘉靖十五年殿易瓦及上御經筵已設寶座正中於是禮部以皇太子受賀不當

復設座殿內乃請上裁上命設於文華殿東廊西嚮
受朝儀

東宮未出閣受朝儀

隆慶五年正月大學士李春芳等言先朝故事東宮未
出閣時閣臣以朔望次日行謁見禮即今春和乞命臣
等舉行如例不惟臣等獲遂仰瞻之私而東宮殿下亦
可閑習禮儀養成儲德且今歲來朝官員咸願一覩睿
容請於二月上旬之吉許臣等率諸臣於文華門朝見

以慰天下臣民之心。上許之。命以二月二日謁見。於是禮部奏上儀注。一前期一日內侍官設東宮座於文華左門外西向。至日錦衣衛設儀仗於門外東西。一是日文武百官及天下來朝官員各具常服詣文華門外北向序立。俟東宮具常服出陞座。文武百官先入班。贊鞠躬四拜禮畢。分班序立。鴻臚寺官引來朝官員詣前北向立。本寺致詞贊鞠躬四拜禮畢。皇太子還宮。

稱禮

定臣下名稱

洪武三年命禮部考定百官及內官於皇太子前所稱禮并諸王前禮部尚書崔亮等會議百官及內使監官於皇太子諸王前稱殿下自稱名東宮官及本宮內使於皇太子前稱殿下自稱臣王府官及本位承奉司官於親王前稱殿下自稱臣百官在上前稱皇太子稱親王曰某王從之

啓事東宮稱臣

洪武十四年十月給事中鄭相同言國初之制凡故事東宮惟東宮官屬稱臣朝臣則否蓋尊無二上之意今一體稱臣於禮未安詔下羣臣議翰林編修吳沈等奏曰東宮國之大本所以繼聖體而承天位者也臣子尊敬之禮何得有異相同之言非是請凡故事東宮者稱臣如故從之

皇長孫讀書

永樂五年夏四月皇長孫出閣就學上召太子少師姚

廣孝翰林院待詔魯瑄鄭禮等諭之曰人於學問常以
先入之言為主朕長孫天資明睿爾等宜盡心開導凡
經史所載孝弟仁義與夫帝王大訓可以經綸天下者
日與講說浸漬久涵養深則德性純而器識廣他日所
資甚大不必如儒生繹章句工文辭為能也廣孝等稽
首受命賜金織羅衣各一襲命大官給旦暮酒饌又名
前禮部儀制司郎中兼右春坊右贊善李繼鼎至復以
為右贊善命侍皇長孫說書

附親王讀書

書堂在皇極門右廂講官以部臣或進士改翰林官充之

二王講讀

嘉靖四十年禮部奉欽定二王講讀禮儀欽天監擇吉日時出閣內侍官先一日設椅子二把於北第一間書堂內坐西面東是日早輔臣三員率領各講讀侍書官共十二員伺候二王殿下同入北書堂內序坐定講臣

等同各官進入行四拜禮畢各退於館外北廊拱候各官行禮畢裕王殿下就於本書堂裏間就坐景王殿下入南書堂裏間就坐輔臣三人各率該講讀侍書官分投進入授書講書其日內侍官捧書展於案上就案左立講讀官以次進立於案前授書各十遍訖令旨先生每吃酒飯內侍官答應各官出酒飯畢時再入侍書官進至座前看寫字寫畢講讀以次進講讀畢各官行一拜禮退臣等各看所寫字照例圈註於旁以備勸益次

日以後每日早二王殿下分詣各書堂各官分投進見
行一拜禮其授書講書者寫字並如前儀輔臣三員止
侍書三日三日後各講讀侍書官皆知規矩已定徑自
如儀授書講書者寫字輔臣皆不預至寫字畢二書堂
每日總輪一內侍官捧各倣紙來內閣輔臣照例圈註
二王殿下每日所讀書大學一本書經一本授書務要
字樣真正講書直說大意務要通曉三日一溫書就溫
講仍進講章寫字先用影本以後寫熟對帖自寫

闕

各官酒飯止是初入書堂時令旨說一次以後日不必再說只於講書罷令旨與先生每茶吃內侍官答應歲率為常

每年假日聖節前後通九日千秋節十日正旦初一至二十日花朝一日清明一日端陽前後通三日七夕一日中秋一日重九前後通三日冬至前後通五日臘八一日除夕前五日每月朔望各一日遇大風雨暫免遇大寒大暑該住歇時請旨定奪

凡講讀侍書官俱於右順門南廊給與酒飯

先期一日各該內外執事官俱赴書堂演禮

此儀本部行內閣題

請萬歷六年定諸王講讀儀循此小有增易

嘉靖三十二年禮部言二王講讀舊規開以二月八月初旬輟以五月十一月初旬今以閏三月請以四月輟講不為例內侍書官每日啟王溫肄仍舊書百字送內閣圈註講讀等官每半月恭詣各府起居如王更欲授書進講及質問疑義字法各官亦得以自効詔可

禮部志稿卷六十七

欽定四庫全書

禮部志稿卷六十八

明 俞汝楫 編

視學備考

視學釋奠

成化視學

成化元年二月上視國子監是日上具皮弁服躬詣先
師孔子行四拜禮命少保吏部尚書兼華蓋殿大學士

李賢太子少保戶部尚書馬昂兵部尚書王竑工部尚書白圭吏部左侍郎兼翰林院學士陳文吏部右侍郎兼翰林院學士彭時戶部左侍郎楊鼎兵部右侍郎王復分獻四配十哲兩廡翰林院官俱陪祀禮畢幸彞倫堂祭酒司馬恂司業張業講書畢駕還宮戊午上御奉天門賜祭酒司業監丞學官及孔顏孟三氏子孫襲衣諸生寶鈔己未詔宴孔顏孟三氏子孫衍聖公孔弘緒等於禮部故事視學祭酒以下皆宴於奉天門至是免

宴以弘緒等遠來特宴之

弘治視學

弘治元年三月上視學行釋奠禮御彝倫堂授經於祭
酒司業賜之坐講明日祭酒費閻率學官監生上表謝
恩上御奉天殿受之賜祭酒司業并三氏子孫及學官
監生襲衣寶鈔等物有差又明日祭酒復率學官監生
謝恩

增視學釋奠儀

弘治元年太子太保吏部尚書王恕言臣竊觀皇上視學釋奠儀注分獻官始終不拜恐非禮也臣愚以為分獻拜位當在殿陛之下列於陪祭官之前上在殿陛上拜分獻官陪祭官俱在殿陛下拜上獻爵畢分獻官以次詣神位前奠爵訖復退於殿陛下原拜位立定贊送神上拜分獻官陪祭官俱拜似為近禮臣讀禮記文王世子篇有曰凡始立學者必釋奠於先聖先師及行事必以幣今皇上嗣登大寶初幸太學即所謂始立學也

臣以為釋奠當用幣爵亦當三獻今儀注無獻幣是行春官釋奠之禮非始立學釋奠之禮也似為未安或以為舊儀如此臣以為舊儀是當從之或有差誤亦當更之以求乎宜不可以訛承訛也禮部覆奏自永樂以來列聖視學祭先師孔子儀注爵止一獻無奠帛之禮每年春秋二丁朝廷遣官釋奠有奠帛三獻爵之儀今恕所奏雖與永樂以來儀注不同然與見行丁祭禮儀無異合增入奠帛三獻爵其分獻官各就殿陛下與陪祭

官俱拜則禮儀全備上曰分獻官拜禮准行餘惟循舊制
三月太子太保吏部尚書王恕言近陳愚見請皇上視
太學釋奠先師孔子當奠幣用樂爵當三獻分獻官當
陪拜伏奉聖旨分獻官拜禮准行其餘仍舊臣竊又以
為我朝列聖即位之後所行之禮有一行而不再舉者
惟耕藉田及幸太學二事然耕藉有奠幣三獻齋戒
省牲之禮何獨於幸學釋奠而乃不然乎昔太宗文皇
帝將幸太學命禮部詳議禮儀尚書鄭賜言宋制謁孔

子服韠袍再拜太宗曰見先師禮不可簡必服皮弁行
四拜禮其事載諸五倫書人以為太宗尊儒重道之意
超越前古今陛下釋奠先師而禮比先農則載諸史冊
傳之萬世豈不為盛事哉命復下禮部會議於是禮部
及詹事府國子監翰林院春坊等官言禮記曰凡學春
官釋奠於其先師註云釋奠者但奠置所祭之物而已
無食飲酬酢等事以其主於行禮非報功也又云凡始
立學者必釋奠於先聖先師及行事必以幣註云諸侯

初受封立學行釋奠之事必奠幣為禮也又云凡釋奠者必有合也有國故則否註云凡行釋奠之禮必有合樂之事若國有凶喪則否又云太學始教皮弁祭菜示敬道也註云學者入學之初有司衣皮弁之服祭先師以蘋藻之菜示以尊敬道藝也蓋古者見師之禮以菜為質故始入學者必釋菜以禮其先師而學官四時之祭乃皆釋奠釋奠釋菜皆祭之略者也故以行禮而行釋奠則無幣差厚於釋菜之意即今天子視學所行是

也以報功而行釋奠則有幣即今二丁所行是也三代之禮無所於考漢祀孔子未行釋奠唐制天子北面跪祭周廣順二年車駕幸曲阜始拜奠祠前宋大中祥符元年幸曲阜謁文宣王廟始鞞袍再拜至我朝太宗皇帝視學躬行一奠四拜之禮尊師重道蔑以加矣列聖相承率循無改至成化元年始加牲用樂雖極尊崇之禮然既非釋奠之正又非釋奠之全卒至紛紛實繇於此此則所謂有其舉之莫之敢廢者矣今恕言奠帛三

獻之禮必須讀祝飲福受胙始為全備原無舊典固難以擅行其欲比依先農之祀又係大明集禮所載洪武舊制亦難以擅改宜但於視學之前致齋一日至期加幣一段樂設而不作餘仍其舊庶幾其可上曰尊先師當以禮既成化初年有所舉惟孔子前加幣用太牢改分獻為分奠其餘儀物俱從永樂年例行

幸學額行

嘉靖十年羽林前衛指揮使劉永昌疏言臣竊觀史傳

皆以數幸太學為帝王盛節我國朝幸學之禮僅於登
極後一行之其於作興之道或有未盡伏望皇上每遇
春秋開講經筵之始先期幸學拜祭先師仍御彞倫堂
進講宣諭賞賚如制則人心感奮而教化大行矣詔下
禮部議尚書夏言等覆言臨幸太學尊禮先師實帝王
崇儒重道之盛舉我皇上經筵日講未嘗暫輟又於文
華東室奉三皇二帝三王及周公孔子神位春秋開講
祭告月朔躬行瞻謁近於西苑無逸殿落成命大學士

坐講幽風無逸諸篇右文崇道之實誠遠邁前代矣顧
臨雍盛事惟於登極一行而近日釐正先師祀典以來
未嘗恭謁永昌欲於春秋開講先期幸學則歲且再行
車駕太數臣竊擬明年朝覲考察會試之後天下大夫
士會集之時宜一舉行上曰先師祀典既正朕當躬謁
如議以明年三月內舉行

視學觀禮

隆慶元年六月命禮部遣官行取衍聖公孔尚賢及翰

林院五經博士顏肇先孟彥璞仍取孔氏老成族人五人顏孟族人二人馳驛來京以聖駕將幸太學也命公侯伯應襲子弟俱赴國子監習禮以禮部言視學在邇欲其迎駕聽講故也朝鮮國王李垣遣陪臣吏曹參判洪春年等齎表文方物馬匹慶賀冊立中宮賜宴賞如例春年等以上將幸太學乞留觀禮許之

幸學隆施

隆慶元年八月癸未朔上幸太學行釋奠禮於先師命

大學士徐階李春芳陳以勤張居正衍聖公孔尚賢吏部尚書楊博兵部尚書郭乾吏部侍郎趙貞吉分奠四配十哲兩廡禮部侍郎潘晟致奠啓聖祠畢上御彝倫堂命武官都督以上文官三品以上及翰林院學士坐賜茶授祭酒司業經坐講上宣諭諸生曰聖人之道如日中天講究服膺用資治理爾師生其勉之甲申上御皇極殿衍聖公孔尚賢率三氏子孫管祭酒事侍郎趙貞吉司業萬浩率學官諸生上表謝恩賜冠服鈔錠有

差仍賜三氏子孫及祭酒司業宴於禮部

遣官釋奠

洪武初定制

洪武元年三月丁丑遣官釋奠於先師孔子初禮官奏周制凡始立學者必釋奠於先聖先師凡學春夏釋奠於先師秋冬亦如之漢儒以先聖為周公若孔子以先師為禮樂詩書之官若禮有高堂生樂有制氏詩有毛氏書有伏生可以為師者蓋四時之學將習其道故釋

奠各以其師而不及先聖惟春秋合樂則天子視學有司總祭先聖先師是則漢時釋奠亦略可見矣魏正始中使太常釋奠於辟雍晉釋奠皆於國學東晉成穆孝武皆親釋奠隋制國子監每歲四仲月上丁釋奠先聖先師州縣學則用春秋仲月唐初釋奠儒官自為祭主直書博士姓名敢昭告於先聖許敬宗奏請令國子祭酒為初獻詞稱皇帝謹遣仍令司業為亞獻博士為終獻縣學則令為初獻丞為亞獻主簿及尉通為終獻丞

為禮制武德貞觀中皆以二月親幸國子監釋奠開耀
景龍中皆皇太子釋奠於太學開元中詔春秋釋奠以
三公攝事著之常式若遇大祀則用仲子州縣用上丁
宋元因古禮而損益之今宜定制以仲春仲秋二上丁
日降香遣官祀於國學以丞相初獻翰林學士亞獻國
子祭酒終獻上然之至是遣官致祭牲用牛羊豕各一
幣一白色籩八實以形鹽藁魚棗栗榛菱芡鹿脯豆八
實以韭菹醯醢菁菹鹿醢芹菹兔醢笋菹魚醢簋簋各

二實以太稷稻梁登一實以太羹釧二實以和羹犧尊
象尊山罍各一實以醴齊盎齊事酒樂用大成登歌樂
四配位牲用羊豕各一幣一白色籩四實以形鹽藁魚
棗栗豆四實以芹菹兔醢菁菹鹿醢登一實以太羹簋
簋各一實以太稷其從祀十哲兩廡各籩二實以栗鹿
脯豆二實以菁菹鹿臠簋各一實以太稷先期皇帝
齋戒獻官及陪祀執事官俱散齋二日致齋一日前祀
一日清晨有司立仗百官具公服侍班皇帝服皮弁服

御奉天殿降香獻官捧由中道出至午門外置龍亭內
儀仗鼓吹導引至廟學是日獻官法服并執事官集齋
所省饌省牲告充告脂視鼎鑊滌漑告潔至日丑前五
刻執事者各實祭物於器獻官及陪祀執事官各就位
監禮監祭官閱陳設糾不如儀者贊禮唱有司謹具請
行事唱迎神樂作獻官及在位官皆再拜樂止贊禮唱
奠幣獻官詣盥洗位搯笏盥帨出笏詣大成至聖文宣
王神位前樂作獻官搯笏上香奠幣出笏再拜以次詣

究國復聖公邾國宗聖公沂國述聖公鄒國亞聖公神位前並如前儀復位樂止贊禮唱進俎樂作獻官至大成至聖文宣王神位前措笏奠俎出笏以次詣四配神位前如前儀出笏復位樂止贊禮唱行初獻禮獻官詣爵洗位措笏滌爵拭爵以爵授執事者詣酒尊所措笏以爵受酒以授執事者出笏樂作獻官詣大成至聖文宣王神位前跪措笏上香祭酒奠爵出笏樂止讀祝官取祝跪讀訖獻官俯伏興再拜以次詣四配神位前並

如前儀亞獻終獻儀並同初獻但不用祝行終獻禮時贊
禮唱行分獻禮分獻官詣盥洗位搯笏盥帨出笏詣爵洗
位搯笏滌爵拭爵以爵授執事者出笏詣十哲兩廡神位
前搯笏奠帛上香祭酒奠爵出笏俯伏興平身復位贊禮
唱飲福受胙初獻官詣飲福位再拜跪搯笏奉爵者以爵
進獻官受爵飲福酒奉胙者以胙進獻官受胙以授執事
者出笏俯伏興再拜亞獻官以下皆再拜復位贊禮唱徹
豆樂作掌祭官各徹豆樂止贊禮唱送神樂作獻官以下

皆再拜樂止讀祝官取祝捧幣者捧幣各詣瘞位獻官詣望瘞位東西各二人以炬燎火俟半燎實土半坎贊禮畢其祝文曰惟王德侔天地道冠古今刪述六經垂憲萬世茲維仲春謹以制幣牲齊粢盛庶品式陳明薦以充國復聖公邠國宗聖公沂國述聖公鄒國亞聖公配尚饗

征儀備考

親征遣將

詔定軍禮

洪武元年閏七月詔定軍禮中書省臣會諸儒臣議古者天子親征所以順天應人除殘去暴以安天下自黃帝習用干戈以征不享此其始也周制天子親征則類於上帝宜於大社造於宗廟禡於所征之地及祭所過山川師還則奏凱獻俘於廟社後世又有宣露布之制若遣將出師則授以節鉞亦告於廟社禡祭旗纛而後行宋又有祭告武成王之禮歸則奏凱獻俘然後天子論功行賞於是歷考舊章定為親征遣將諸禮儀奏上詔並從之

親征儀 見職掌

遣將出師儀授節鉞禮儀前期拱衛司設大將軍次於午門外兵部官備節鉞陳於奉天殿內架上內使監設御座於殿中侍儀司設大將軍拜位於丹墀中道稍西又設授節鉞位於御前俱北向設內贊位及授節鉞官位受節鉞執事位於大將軍受節鉞位之北東西相向百官侍立位於文武樓之北東西相向通班贊禮位於大將軍丹墀拜位之北通班在西贊禮在東引大將軍二人位於通班之

次其餘侍衛陳設如朝會儀是日鼓初嚴侍儀導從官
入迎車駕次嚴文武官具朝服入侍立位大將軍朝服
入立候於丹墀之西北所部將士鼓吹皆候於午門外
鼓三嚴皇帝服武弁服出樂作陞座樂止鳴鞭捲簾報
時訖引班引大將軍就丹墀拜位贊禮唱鞠躬拜樂作
四拜興樂止引大將軍由西陛陞西門入內贊接引至
御前唱鞠躬樂作再拜興樂止唱跪措笏大將軍跪措
笏授節鉞官取節鉞至御前跪承制興立於大將軍之

東北宣制訖先授節次授鉞大將軍以次受訖以授執事者執事者跪受立於西唱出笏俯伏興樂作大將軍出笏俯伏興復再拜樂止自西門出執節鉞者前行至位分立於左右樂作贊禮復唱鞠躬四拜興禮畢樂止皇帝興樂作還宮樂止大將軍出勒所部建旗幟鳴金鼓正行列擊節鉞奏樂前導百官以次送出

告祭廟社儀與遣官奏告廟社禮同就命大將以牲幣行一獻禮師還則陳凱樂俘馘於廟社門外而祭告之

與出師祭告儀同

祭武成王廟儀前期二日有司請大將以下次及省牲位於廟南門外前一日及諸將陪祭官詣廟所致齋執事者於齋所肄儀大將省牲廩犧令牽牲自東過大將軍前省訖詣神厨視鼎鑊滌漑遂烹牲大將還齋所執事者洒掃陳設至日清晨讀祝官於大將幕次僉祝版執事實祭物於器訖大將以下具服入就位贊禮贊拜大將以下皆再拜訖贊引引大將詣盥洗所悅訖詣武成王

神位前搯笏上香奠幣出笏再拜興詣配享神位前如
前儀復位贊禮唱進俎贊引復引詣武成王神位前搯
笏進俎配位前亦如之復位贊禮唱獻官行禮贊引引
詣爵洗所贊搯笏受爵滌爵拭爵以授執事者出笏詣
酒尊所搯笏受爵酌酒以授執事者引詣神位前贊跪
搯笏受爵三祭酒奠爵讀祝官讀祝訖大將興再拜詣
配位前如之復位初大將行禮時贊引引分獻官各詣
兩廡神位前分獻如正獻禮贊飲福受胙引大將詣武

成王神位前跪搢笏飲福酒受胙出笏興再拜復位徹
豆贊賜胙正獻官免拜分獻以下皆再拜贊禮唱望燎
執事者以祝幣詣燎所大將望燎燎半贊禮畢以次出
禡祭軍牙六纛儀與祭武成王同但奠幣行三獻禮大
將初獻次將亞獻終獻不進熟

奏凱儀先期大都督以露布聞大將未至前一日所司設
大將次於午門外內使監官陳御座於午門樓上前楹當
中南面侍儀司設大將拜位於樓前北向諸將位於大將

之後文武百官位於諸將之南文東武西奏凱樂位於大將位前協律郎位於奏樂位之北司樂位於協律郎之南俱北向贊禮位於樓前大將拜位之北文武官侍立位於兩傍諸將侍立位於文武班之北俱東西相向大將侍立位於諸將之北東向引班舍人位各於所引官之北東西相向又設獻俘位於樓前少南獻俘將校位於獻俘位北刑部尚書奏位於將校之北皆北向又設刑部尚書受俘位於獻俘西東向設露布案於內道正中南向受露

布位於案東西向承制位於案東北西向宣露布位於
文武班之南北向至日侵晨大將以下入就侍立位皇
帝常服乘輿出升樓即御座侍衛如常儀大將以下就
拜位贊拜大將以下皆四拜退就侍立位贊奏凱樂協
律卽執麾引樂工就位司樂俛伏跪請奏凱樂協律卽
舉麾鼓吹振作徧奏樂曲其曲隨事撰述樂止司樂跪
唱謹奏樂畢協律以下以次退凱樂初奏將校引俘侍
立於兵仗之外樂畢贊宣露布承制官承旨以露布付

受露布官詣露布案跪受由中道南行以授宣露布官
宣訖將校引俘至位刑部尚書跪奏曰某官某以某處
所俘獻請付所司奏訖退就受俘位俟旨其就刑者立
於西廂東向以付刑官其宥罪者樓上承制官宣旨曰
有勅釋縛樓下承傳宣旨釋訖贊禮贊所釋之俘謝恩
皆四拜呼萬歲者三將校以所釋俘退如有所賜就宣
旨賜之大將以下就拜位皆四拜搢笏舞蹈山呼萬歲
者三出笏復四拜乃出文武官就位四拜搢笏舞蹈山

呼如常儀復四拜班首稍前跪稱賀致詞訖俯伏興復位及衆官復四拜禮畢乘輿降樓還宮百官以次出外論功行賞儀前期中使監陳御座香案於奉天殿如常儀尚寶司設寶案於殿中侍儀司設詔書案於寶案之前誥命案於丹陛正中之北設皇太子諸王侍立位於殿上之東北設承制位於殿上之東宣制位於丹陛誥命案之北吏部戶部禮部尚書位於殿上之東南設大都督府兵部尚書位於殿上之西南應受賞官拜位於丹

墀中序立位於丹墀西南受賞位於誥命案之南受賞
執事位於受賞官序立位之西每官用捧誥命捧禮物
各一人俱北向餘陳設如期會議是日鼓三嚴執事官
各就位皇帝服袞冕御輿以出樂作陞座樂止捲簾鳴
鞭報時訖皇太子諸王具袞冕自殿東門入樂作至殿
內侍立位樂止受賞官入就拜位樂作四拜樂止承制
官跪承制由殿中門出吏部戶部禮部尚書由殿西門
出立於誥命案東承制官至丹陛中南向稱有制受賞

官皆跪宣制曰朕嘉某等為國建功宜加爵賞今授以
某職賜以某物其恭承朕命宣畢受賞官俯伏興樂作
再拜樂止行賞受賞官第一人詣案前跪措笏吏部尚
書捧誥命戶部禮部尚書捧禮物各授受賞官以授左
右出笏俯伏興復位餘官以次受賞訖承制官吏部尚
書等俱至御前復命退復位樂作受賞官皆再拜樂止
措笏鞠躬三舞蹈呼萬歲者三出笏俯伏興樂作復四
拜樂止樂畢皇帝興樂作至謹身殿樂止皇太子諸王

還宮受賞官及文武官以次出至午門外以誥命禮物
置於龍亭用儀仗鼓樂各送還本第明日進表稱謝如
常儀

獻俘

征倭獻俘

嘉靖三十五年十二月該提督軍務工部尚書趙文華
奏稱擒獲賊首陳東等三名倭首辛五郎等四名及首
賊徐海首級函解到京乞要獻俘奉聖旨禮兵二部查

議來說欽此該本部會同兵部着得陳東等本以華民背逆天道勾引倭奴辛五郎等侵擾內地流毒三省惡逆深重罪不容誅茲當奏凱之辰宜舉獻俘之典臣等謹查的大明會典獻俘事宜開具奏請其倭賊陳東等七名一面押送法司訊罪一面行欽天監擇吉獻俘其徐海首級法司驗收候陳東等取決之日一併通行傳首梟示浙江閩廣沿海地方永為倭逆入犯之戒等因奉聖旨這備制所擬都依行欽此

前期禮部告示文武百官具朝服詣午門前行慶賀禮
先一日內官監設御座於午門樓前楹正中是日早錦衣衛
設儀仗於午門前御道之東西教坊司陳大樂於御道南
西北向鴻臚寺設贊禮二人於午門前東西相向設文武
官侍立位於樓前御道南文東武西相向及刑部獻俘官
位於午門前御道東稍南西向設獻俘將校位於午門前御
道西稍南北向引禮引文武官東西序立獻俘將校引俘
列於午門前西邊文武班之後候文武班齊獻俘將校引

俘至獻俘位北向立定俘跪於前刑部官於樓前中道
跪具本奉聞候旨處決其合受刑陳東等七名刑部官
同將校押出仍赴法司監候文武百官行五拜三叩頭
禮以次退

受降

受降禮

洪武四年秋七月乙丑指揮萬德送明昇並降表至京
師初上聞大軍下蜀命中書集六部太常翰林院定議

受降等禮省部請如宋太祖乾德三年受蜀主孟昶降禮上御奉天門昇等於午門外跪進待罪表侍儀使捧表入宣表官宣讀訖承制官出傳制官出傳制昇等皆俯伏於地侍儀舍人掖昇起其屬官皆起跪聽宣制釋罪昇等五拜三呼萬歲承制官傳制賜衣服冠帶侍儀舍人引昇丹墀中四拜侍儀使傳旨昇跪聽宣諭俯伏四拜三呼萬歲又四拜出丞相率文武百官行賀禮上曰明昇與孟昶不同昶專治國政所為奢縱昇年幼事

由臣下宜免其叩頭伏地上表請罪之禮是日昇及其
官屬朝見百官稱賀制授昇為歸義侯賜冠帶衣服及
居第於京師

禮部志稿卷六十八
出士去散雖云與是日具其